



Studegiar rumantsch

In studi cun ina gronda diversidad

Per esser ina lingua pitschna regionala enconuscha il rumantsch ina diversidad surprendenta da tradiziuns litteraras e culturalas. Questas n'èn betg mo il product da l'isolaziun da vals da muntogna, mabain era da blers contacts intensivs cun autras linguas e culturas. Il studi da la retoromanistica schlargia perquai la vista sur ils cunfins stretgs da «l'agen» ora sin process da stgomis linguistics e culturalas.

Lingua

Il rumantsch sa distingua tras ina gronda varietad da furmas linguisticas orales e scrittas. Da las particularitads da questas linguas regionalas resultan dumondas specificas che na regardan betg mo la sociolinguistica, mabain era la politica da linguas. Las sfidas per la linguistica èn il spectrum vast dals adievers dal rumantsch e las stentas da standardisaziun surregionala.

Litteratura

Suenter in'emprima fasa religiosa è la litteratura rumantscha vegnida influenzada da tradiziuns popularas e patrioticas. En il decurs dal 20avel tschientaner s'orientescha ella adina pli ferm vi da tradiziuns da la moderna europeica. Da là derivan dumondas interessantas che pertutgan la relaziun tranter litteraturas «grondas» e «pitschnas» ed ils limits da l'applicaziun da models teoretics e critics externs.

Dumondas da minoritads

La scienza da litteratura e la linguistica rumantscha s'occupan per forza era cun dumondas da la sociologia da minoritads e da la teoria da cultura. Studegiar rumantsch

vul adina era dir s'occupar da discurs moderns davart l'identitad, la globalisaziun e la regionalisaziun ed era cun domondas da politica linguistica e culturala naziunala ed internaziunala.

Structura dal studi

Il studi da rumantsch è structurà tenor il model da Bologna en in Bachelor (BA, durada da trais onns) ed in Master (MA, durada da dus onns). Il studi da Bachelor serva per entrar en il studi da lingua e litteratura rumantscha. Il studi da Master serva per approfondar il studi da lingua e litteratura rumantscha. Bachelor e Master consistan da prelecziuns e seminaris, dad exercizis e curs da lingua, da lavurs scrittas e praticums.

Per il rom «lingua e litteratura rumantscha» pon ins acquistar in Bachelor da 60 ECTS ed in Master da 30 ECTS. Infurmaziuns detagliadas survegnis Vus da las persunas da contact.

Retoromanistica a Turitg

Pitschna e simpatica: la linguistica e la scienza da litteratura rumantscha n'èn betg in rom da massa. La quantitad da studentas e students survevaivla permetta contacts persunals ed in bun accumpagnament. Las studentas ed ils students enconuschan in l'auter ed apprezzeschan l'atmosfera famigliara en il Seminari da romanistica. Quai èn premissas impurtantas per in studi fritgaivel.

Per il studi da retoromanistica a Turitg dovri enconuschentschas dad almain in idiom rumantsch ch'ins po era acquistar en in curs durant plirs semesters. L'atmosfera famigliara attira era persunas che n'èn betg da lingua materna e che vulan s'occupar cun las tradiziuns d'ina lingua pitschna e debattas cuntraversas en la


Rumantschia. Nossas occurrenzas porschan la pussaivladad per discussiuns animadas davart la descripziun e la valitaziun da particularitads linguisticas e litteraras rumantschas ed era per vegnir ad enconuscher autras linguas latinas ed autras litteraturas svizas.

Scienza litterara rumantscha

Litteratura rumantscha da l'origin enfin il temp dad oz, specificamain tradiziuns litteraras e modernisaziun, mitos e stereotipas dad ina litteratura regionala, narratologia, intertextualitad, plurilinguissem, varietads linguisticas sco meds stilistics.

Linguistica rumantscha

Istorgia da la lingua e descripziun da la lingua actuala, discussiuns davart la norma scritta, etappas da la standardisaziun dal rumantsch, meds da massa, meds da communicaziun actuals, sociolinguistica ed istorgia externa dal rumantsch, istorgia dal moviment rumantsch, scienza da la translaziun.



Charta da l'Uffizi federal da statistica, www.bfs.admin.ch

Ulteriurs temas

AssistentAs e lectorAs s'occupan dad ulteriurs temas, tranter auter da:

- exercizis da scriver, scriver creativ, scriver schurnalistic, exercizis da translaziun e terminologia
- curs da lingua e lectura en sursilvan, vallader e rumantsch grischun
- introducziuns al studi

Il Seminari da romanistica

Il Seminari da romanistica è bain equipà. Ils indrizs electronics èn dals pli moderns. La biblioteca al seminari cuntegna ca. 200'000 toms ed è cun quai ina da las pli grondas dal territori tudestg; ella ha ina bella quantad da litteratura primara e secundara rumantscha. Las studentas ed ils students han a lur disposiziun in grond dumber da plazs da lavur attractivs.

Perspectivas professionala

Il studi da rumantsch sa lascha cumbinar cun blers auters roms ed avra perspectivas professionalas multifaras ed attractivas:

- instrucziun da rumantsch en gimnasis grischuns ed en la Scol'auta da pedagogia dal Grischun;
- instrucziun da rumantsch en scolas privatas ed en scolas autas popularas;
- promoziun linguistica ed animaziun culturala (Lia Rumantscha ed associaziuns regionalas, chantun Grischun, Uffizi federal da cultura);
- translaziuns (chantun Grischun, Confederaziun);
- bibliotecas e chasas edituras;
- schurnalissem (Radio Rumantsch, Televisiun Rumantscha, La Quotidiana, Agentura da Novitads Rumantscha);
- scienza (Dicziunari Rumantsch Grischun, Archiv da litteratura a Berna).

MINOR
60/30

Universität Zürich
Romanisches Seminar
Zürichbergstrasse 8
CH-8032 Zürich

Christian Seidl (Büro E 33)
Tel. +41(0) 44 634 54 58
cseidl@rom.uzh.ch
www.rose.uzh.ch

Infurmaziun

Beratungsstellen rund ums Studium

www.uzh.ch/studies/infoadvice/advice.html

Alle Studiengänge der UZH unter

www.degrees.uzh.ch

Studium am Romanischen Seminar

www.rose.uzh.ch/de/studium

Lehrdiplom für Maturitätsschulen

www.ife.uzh.ch/de/llbm.html